

摘藻堂四庫全書薈要

集部

欽定四庫全書薈要

集部

臨川文集卷

四十九  
五十

詳校官助教臣常循



欽定四庫全書薈要卷一萬四千七百三十七

集部

臨川文集卷四十九

宋 王安石 撰

外制

召試三道

節度使加宣徽使制

翰林學士除三司使制

誠勵諸道轉運使經畫財利寬恤民力制

皇姪宗實可起復舊官知宗正寺制



皇姪知宗正寺宗實可岳州刺史充本州團練

使制

司馬光知制誥制

司馬光改天章閣待制制

馮京權知開封府制

范鎮加修撰制

趙抃兼侍御史知雜事制

韓縝改殿中侍御史制

沈立李大臨朱壽隆可三司戶部度支鹽鐵判

官制三道

李壽朋陸經張洞開封府推官制三道

王陶皇子伴讀制

施昌言知渭州沈邁知杭州李允知鄧州制三

道

李東之判西京留守司御史臺制

王綽知徐州鞠真卿知壽州何郊知永興軍潘

夙知桂州制四道

余靖司馬光張瓌加恩制三道

賈黯蔡襄王珪范鎮馮京余靖李柬之轉官加  
勲邑食邑制七道

呂公弼工部侍郎制

司馬光禮部郎中制

周沆右諫議大夫制

沈遘起居舍人制

掌禹錫趙良規並秘書監制

王綽秘書少監制

李丕緒少府監制

宋任呂公孺馬從先解賓王並太常少卿制四

道

召試三道

節度使加宣徽使制

門下推轂授師擁旄乘塞擅生殺之柄於外繫安危之

體於中厥有顯庸宜膺寵數誕揚孚號明示庶工具官  
其學足以通大方謀足以斷衆事有經天之業有扞城  
之材比以明揚屢更煩使遂躋膺仕良副訐謨維塞路  
之要藩實兵防之重寄職爾鎮撫紓予顧憂蓋爵賞之  
加不遺於近小豈藩維之任顧可以弭忘用是疇其展  
采之勞寵以宣猷之號繫人謀之衆允匪朕志之汝私  
夫任重者其憂不可以不深位高者其責不可以不厚  
號名之美禮秩之崇非期假寵以擅榮茲用論功而取



稱矧夫守國之圉謀王之師聯輔相之籍於殿中居士  
民之瞻於天下其思祇慎以副褒優可

翰林學士除三司使制

勅三司使天下之盛選也自尚書六官名存實去而三  
司之職事所總居多則非夫仁明肅乂足以輔世濟物  
者奚宜任此哉具官某有疏通之才有直亮之操閱言  
崇議足以經綸王家高文典策足以鼓動當世遂以人  
望揚於禁林若夫施政之後先生財之本末蓋嘗深思

而熟講殫見而洽聞則居天下之盛選主朝廷之大計  
詢考在位孰如汝宜夫聚天下之衆者莫如財理天下  
之財者莫如法守天下之法者莫如吏維予任汝其聽  
勿疑法之不善者汝得以議而更吏之不良者汝得以  
察而去則夫調度之不時費出之無常邦用之不給元  
元困於征求而愁怨於下者直汝之恥也夫行已有恥  
而後可以為士矧吾左右信任詢謀所同而觀聽之所  
在者乎往祇厥官其亡以寵利而為士恥可

誠勵諸道轉運使經畫財利寬恤民力制  
夫閔仁百姓而無奪其時無侵其財無耗其力使其無  
憾於衣食而有以養生喪死此禮義廉恥之所興而二  
帝三王誠勅百工諸侯之所先後世不可以忽者也朕  
夙興夜寐聽治不怠囿游宮室之觀無所增飾而躬以  
節儉先天下之士然而不忍人之政考諸先王未有以  
及之也凶年飢歲民之父子夫婦猶有不得保其家室  
而放乎溝壑意者吏或不良不知所以賑救省憂之方

而使之至此耶今吾別諸道置使者使得察吏之良否而視民之疾苦輒具以言而任事者或不惟朕志之所急而以侵牟之為故甚非所以遣使者慰安元元之意也夫轉輸天下之財以給有司之費皆有常數而無橫求誠能御輕重斂散之權而禁因緣之姦則何患乎經入之不足彼前世良吏能紓其民而官事亦不耗廢者豈有他哉亦在乎勉之而已若乃操聚斂之贏以為功而不知百姓與足之義非惟逆於朕志而有司考績之

法亦將不汝容焉朕言維服其聽母怠可

皇姪右衛大將軍岳州團練使宗實可起復  
舊官泰州防禦使知宗正寺制

勅先王糾合宗族而分職以治之所以嚴宗廟也宗廟  
嚴則禮俗成而天下治其事豈可以輕哉今朕選於近  
屬以修宗正之官亦先王治親之意也以爾具官某惠  
仁孝恭忠信純篤故遷厥位以稱禦侮之實而使任事  
焉夫士之欲施於政未有不學而能者學所以修身也

身修則無不治矣朕言維服爾往懋哉可

皇姪右衛大將軍泰州防禦使知宗正寺宗  
實可岳州刺史充本州團練使制

勅孝子之思慕無窮而送終有既者先王之禮也具官  
某祇慎克孝能良於喪去位家居三年於此矣其還位  
號復序內朝朕命維新往欽無斁可

起居舍人直祕閣同修起居注司馬光知制

誥制

勅先王誥命之文何其雅馴而奧美雖出命非有司之事而討論潤色蓋有助焉以爾具官某操行修潔博知經術庶乎能以所學施於訓辭俾掌贊書往詣朕志可起居舍人直祕閣同修起居注司馬光改天

章閣待制制

勅揚雄曰周之士也貴秦之士也賤周之士也肆秦之士也拘蓋先王以禮讓為國士之有為有守得伸其志而在上不敢以勢加焉朕率是道以君多士以爾具官

某文學行治有稱於時故明試以言使司告命而乃固執辭讓至於八九改序厥職以伸爾志是亦高選往其懋哉可

翰林侍讀學士右正言馮京改翰林學士知制誥權知開封府制

勅學士職親地顯而開封典治京師非夫忠厚仁恕而有文學政事之能孰可以任此具官某造行直方受材博敏踐更中外休顯有稱論思禁林尹正畿甸詢謀惟



允其往懋哉可

范鎮加修撰制

勅昔周人藏上古之書以為大訓而孔子春秋天子之事也蓋夫討論一代之善惡而撰次以法度之文章非夫通儒達才有識足以知先王不欺足以信後世則孰能託尚書春秋之義勒成大典而稱吾屬任之指乎以爾具官某有該通之材有純潔之操辯論深博溢於文辭論思禁林時議惟允則夫案善惡見聞之實斷是非

去取之疑人之所難宜以命爾爾其精思熟考自勉以古之良史毋襲近世比事屬辭之失使來者無所考稽可

右司諫趙抃禮部員外郎兼侍御史知雜事

制

勅某朕置御史以為耳目非更事久而能自稱職則不以知雜事也以爾嘗任言責有猷有為行義之修士人所譽故遷郎位使在此官悉其誠心迪上視聽義之與

比時乃顯哉可

屯田員外郎韓縝改殿中侍御史制

勅某朕使學士五人舉二人以為御史又於二人擇取  
一人而以汝為之汝名臣之子世載榮問愷悌忠信學  
知大方無蔽於儉人無撓於大吏無迪上以非先王之  
典而同乎流俗時汝稱職往其勉哉可

兵部郎中沈立可依前官充三司戶部判官

制

勅某擅一道之財而開闔斂散之以給縣官之費而又  
察舉吏士之賢不肖問民之疾苦與夫入佐三司而四  
方之言利者必稽焉其職事之責等爾汝以才能屢試  
而行義加修使於東南歲月久矣還裨掌計之治所以  
慰將命之勞惟爾博學多聞固嘗知夫百姓與足之義  
古人有言曰尊其所聞則高明行其所知則光大矣可  
不勉哉可

度支員外郎充祕閣校理李大臨三司度支

# 判官制

勅某天下之食貨皆領於三司故朕常難於置使而又  
考慎其屬以稱之爾以文學為官而政事嘗有所試清  
明敏達可使治煩往踐厥官其知所守矣可

## 金部郎中朱壽隆三司鹽鐵判官制

勅某取於山海之無窮以助縣官之不給所以開闔斂  
散之不可以無術也非夫廉辨敏明之吏孰能任此者  
乎爾純行美材久於煩使往共厥服維是勉哉可

度支員外郎李壽朋開封府推官制

勅某朕布大慶於天下惟士之有能有為而不獲盡者  
豈一日而忘哉爾以政事之材而濟之文學無所避憚  
以修厥官陷於吏議失職久矣尹正畿甸四方所瞻姑  
往佐之以永民譽可

殿中丞充集賢校理陸經開封府推官制

勅某天下無事休養生息百年於此而京師之人衆矣  
獨開封以一尹治之故朕常慎擇材士以為之佐庶幾

乎其不勞而治也爾材茂質美久於湮阨而智能彌劭  
行義加修姑使治煩往其自勉可

太常博士充祕閣校理張洞開封府推官制  
勅某開封任重事叢故常擇才士以為之佐爾以文章  
學問列職校讐出試一州風績彌劭膺此遴選往其勉  
哉可

左司諫王陶皇子伴讀制

勅某自天子至於士未有不待學而成者今朕欲進諸

子於學求可與居者而大臣以爾為言爾久在諫工有聞於世茲惟慎選可不勉哉可

樞密直學士施昌言知渭州制

勅夫出河祕文中嚴於禁閣臨渭分閫外肅於戎亭進陪侍從之聯往膺經略之寄茲為異數授受維艱具官施某才劬兼人聞望映世早攄素蘊寔階清塗南榻計庭裨贊之功可計西廂樞府論思之効尤彰洎出總於藩條且屢制於邊瑣事經畢舉政績用成宜易餘杭之



符就撫氏羌之塞爾其坐護諸將善固吾圉而今而後  
無西顧之憂者繫爾之力可不勉哉可

知制誥沈邁知杭州制

勅東南奧區杭越重鎮眷惟師帥之選屬于侍從之良  
宜有褒優式示毗倚具官某風姿爽拔器宇閎深早登  
高妙之科亟躋通顯之列校文東觀典學擅乎多聞演  
誥西垣英辭鼓乎羣動比抗章而請郡期調膳以奉親  
曾未朞年已聞報政乃就更於淮海庶益便於庭闈載

念錢塘之邦方虛銅虎之守宜共易闕之命仍選應宿之  
資服我新恩寵爾故里與夫引會稽之紱又相萬也爾  
惟懋哉可

龍圖閣直學士知河陽李兌給事中依前龍  
圖閣直學士知鄧州制

勅鄧於京西為一都會提兵以守常擇大吏且有加命  
寵榮其行具官某寬和靜深方厚篤實嘗由御史遂為  
諫官延閣侍從之班方維帥守之任焯有績效見於事

為序於東省之華寄以南陽之重按撫吏士治軍牧民  
數宣詔條鎮靖風俗繫汝能力往其勉哉可

龍圖閣直學士李柬之刑部侍郎充集賢院  
學士判西京留守司御史臺制

勅古之仕者難進易退陵夷至於後世而禮義廉恥幾  
乎息恬於勢利者鮮矣而苟得躁進者不乏於朝教之  
未孚朕甚患之顧吾左右親近之臣行義合於古之仕  
者宜從其志使在位之貪者有愧而慕焉具官某名臣

之子能自修敕出備蕃維之任入為侍從之官而乃力辭顯榮退就閒職別都執憲地清務簡特峻秋官之秩仍通麗正之班吾惟爾嘉其往居息可

知雜王綽吏部郎中直龍圖閣知徐州制

勅某知雜御史於朝廷之士為高選非精明彊直不能稱其任也爾更踐多矣有聞於時故從遠方召置此位乃以病告至於再三出臨大州進直嚴閣又增郎位以寵爾行其亦懋哉往共厥服可

集賢校理鞠真卿可光祿寺丞依舊充集賢

校理知壽州制

勅某付之千里之地能禁暴去悍拊循鰥寡使良民有以保息而吏不敢為侵冤豈非所謂能者哉若爾之材歷選於朝而久試於外固時之所謂能者朕所加省而不忘今夫壽劇郡也故徙汝以治之而稽汝歲功當得遷位丞於光祿其往勉哉可

何郊知永興軍制

勅朕初即位慎考俊乂之臣付之方鎮具官某廉清質直敦大詳敏藝文之學政事之材左右具宜以有聲績作國西屏雍維大都鎮撫一方老成是賴序遷厥位往牧其人其勵猷為以膺任屬可

潘夙轉官知桂州制

勅某桂於西南為一都會蠻夷荒忽鎮撫有宜故於用人常慎其選爾清明敏達寬博惠和更事有功簡在朝論遷序即位往其勉哉可

尚書左丞余靖制

勅朕有大賚雖疏逖微細必加焉况於位序高任屬重  
寵章徽數其可略乎具官某政事之材藝文之學踐更  
中外光顯有聲躋登大官鎮撫荒服能率厥職相時休  
成衍食序勲往其祗服可

天章閣待制司馬光制

勅陟降左右司朕躬之闕者至親篤信之臣也邦有大  
賚其可以後而忘乎具官某政事藝文操行之美有聞

於世簡在朕心相時明禋庀事惟謹進階序爵其往懋哉可

尚書戶部郎中知制誥張瓌制

勅朕宗祀先帝以配昊天而均福釐於在位疏遠微賤無遺者矣又況於侍從之臣乎具官某德厚資深志方行潔安於義命為世寶臣考慎樂禮相時大事進階序爵其往懋哉可

翰林學士知制誥賈黯轉官加勲邑制



勅朕初即位奉行先帝故事不敢有廢也具官某剛  
毅篤實閎深博敏先帝所遺以論思左右者也其遷  
厥位加賜恩典其往欽哉可

翰林學士知制誥權三司使蔡襄轉官加食  
邑制

勅朕祇若先帝之初大賚以勞天下職親地禁之臣  
皆先帝所遺以助朕者也其可以後而忘哉具官某  
率德秉義以綏寵祿主國大計功昭於時班命有章往

欽無數可

翰林學士兼侍讀學士知制誥充史館修撰  
王珪轉官加食邑制

先帝投天下之艱以屬朕身永惟所與濟此者豈非左  
右之良哉具官某秉哲迪義士民所望論思潤色有補  
於時大賚之恩外通四海況於親近豈可以忘往服寵  
章愈其慎哉可

翰林學士知制誥充史館修撰范鎮轉官加

勲邑制

勅朕雖哀恫永惟付託之重不敢忘先帝寵綏海內  
褒厚羣臣之意具官某敦大閎博清明敏達職親地密  
為國信臣遷序位等申之恩典惟慎厥服往膺顯榮可  
翰林學士知制誥權知開封府馮京轉官加

勲邑制

先帝以盛德成功克終天祿眇然在疚永念嗣訓非左  
右之良孰與濟此哉具官某秉哲蹈義士民所望尹正

京邑善聲流聞邦有大賚當由貴始往膺榮祿無替厥修可

集賢院學士余靖轉官加勲邑制

先帝君臨天下餘四十年功德之所及博矣非文武之士協力中外何以致此哉在後之侗纂修成法敢忘大賚以勞衆工具官某敦大閎深清明敏達蕃屏帝室厥功茂焉恩典寵章往其欽服可

集賢院學士李柬之轉官加勲邑制

先帝棄天下不及班命以勞羣臣朕繼大統其承厥志  
具官某廉靜忠恕濟以詳敏能紹世美為時名臣膺服  
寵章往其思勵可

龍圖閣直學士給事中呂公弼改工部侍郎  
制

勅褒德序功制為祿位先帝所以熙庶政也朕雖在  
疚所不敢忘具官某保身慎行舊有榮聞陟降左右是  
為世臣惠綏西南風績尤顯冬官之貳其往欽哉可

待制司馬光禮部郎中制

勅左右侍從之臣皆先帝所遺以助興政理者也有  
勞可錄朕敢忘哉具官某行義信於朝廷文學稱於天  
下比更任使會課當遷進位二等以嘉爾績爾方以經  
術入侍而又兼諫爭之官往其思致厥身使朕之聰明  
無所不通爾亦維有無窮之聞可

周沆右諫議大夫制

勅堯舜黜陟幽明之法其詳不見於經蓋其考績之次

序必始於朝廷之貴者朕率是道進退百官故於邇臣  
無有私德以爾具官某忠厚謹潔惠和寬博嘗被方維  
之重任久參侍從之要官內外之勞皆宜有賞而以稱  
士失實控於吏議為郎武部七歲於茲著論積功進位  
西省夫職在盡規之地官又以諫為稱維是將明往其  
思勉可

右正言知制誥知越州沈邁起居舍人制

勅列名侍從分職方維厥有庸勲朕其甄序具官某端

良足以有守精敏足以有謀為時寶臣典掌明命出撫  
州部治聲流聞內外之勞進遷惟允序官二等以懋厥  
勤是謂寵榮往其祇服可

掌禹錫趙良規並祕書監制

勅祕書圖籍藝文之府而置監在光祿衛尉諸卿之右  
其材實德望當有以稱之以爾具官某等歷官滋多服  
采惟謹序於卿位簡在朝廷宣布詔條討論典故久於  
任使亦各有勞宜推增秩之恩以信懋功之法往從官



次無或不祇可

王綽祕書少監制

勅朕初嗣位大賜天下文武在位各以序遷具官某出入踐更名聞休顯奉常之副用勞厥勤乃辭官榮以避親諱綏予孝子改貳祕書往服寵章靖共無斁可

光祿少卿李丕緒少府監制

勅少府古官於朝廷之位尊顯矣具官某行義祇飭材能敏達外更器使績用每成有司以聞又當增位往膺

秩物無怠厥修可

司封郎中宋任太常少卿制

勅士以序遷至於卿位亦榮矣非才智有以任事行義  
有以保身豈能致此具官某中外踐更久於郎選明習  
衆事見稱於時往即厥官勉之無斁可

江南西路轉運使呂公孺太常少卿制

勅某太常兼夔與伯夷之事非夫藝實德望有以過人  
孰宜為之貳也爾名相之子以才見稱出入踐更休有

風績序遷厥位其往欽承可

職方郎中通判太原府馬從先太常少卿制  
勅某太常禮秩異於諸卿非文學入官則不得為其貳  
也以爾行治之美才能之敏踐更多矣皆有可稱會課  
於朝躋登此位往求自稱惟既厥心可

解賓王太常少卿制

勅某今之太常兼夔與伯夷之官非夫寅恭清明博習  
於禮樂則孰能為之貳也今朕考行序勞而以爾為貳

於太常維爾嘗以材稱而屢更任使雖身在外而名位亦云顯矣所以稱此者可無勉哉可

臨川文集卷四十九

欽定四庫全書薈要卷一萬四千七百三十八

集部

臨川文集卷五十

宋 王安石 撰

外制

三司鹽鐵副使陳述古衛尉少卿制

郭永光祿少卿制

林億司封薛求司勳郎中制二道

齊恢度支張景憲金部郎中制二道

陳述古司封郎中趙抃戶部員外郎張燾刑

部郎中制三道

朱處約孫抗孫琳並祠部郎中制三道

王陶杜千能祠部張燾兵部郎中制三道

苗振職方王舉元刑部郎中制二道

王綽刑部郎中制

胡況周燮都官宋孝孫比部郎中制三道

錢暄比部王繹工部郎中制二道

李章周延雋竇綱卜紳朱從道晁仲綽鄭隨並

屯田郎中制七道

杜訢屯田員外郎制

薛仲孺虞部郎中制

楚建中邢夢臣王昇張師顏晏成裕並祠封員

外郎制五道

蔡抗度支員外郎制

蘇宋王益柔並兵部員外郎制二道

錢公輔祠部員外郎朱延世虞部鄭伸駕部

員外郎制三道

許遵陳汝義章俞韓繹劉牧王易知並職方員

外郎制六道

謝景初何世昌陳安道晁仲約唐諲林大年並

都官員外郎制六道

胥元衡李處厚並屯田員外郎制二道

呂元規可駕部員外郎制

吳克劉敞轉官制二道



劉覺等轉員外郎制

王伯恭王允李正臣劉叔實轉官制四道

三司鹽鐵副使陳述古衛尉少卿制

勅某考課黜陟之法雖疎逖未嘗不信又況於近而顯者乎具官某以才自奮能世其家出入踐更休有風績列卿之貳其往勉哉可

郭永可光祿少卿制

勅某外廷之位能至於九列者少矣具官某踐更衆職

功善自昭年除歲遷以致卿位進寵一等往承惟休可

林億司封郎中制

勅某朕有官祿慶賞以序功而其施始於朝廷之近爾  
以藝文被選而多所踐更通籍禁中庀官闕下序遷郎  
位既極左曹往即寵榮愈其勵勉可

薛求司勳郎中制

勅某朕布大號在廷文武之士皆得進官一等而伐閱  
當遷者又各得以序遷爾中外踐更以才自顯膺此恩

典往其勵哉可

權提點成都府路刑獄齊恢度支郎中制

勅某朝廷選實才臣以使諸路而察庶獄之不辜厥有  
庸勲朕當甄序爾才能行義士論所稱會課有司實應  
遷法往膺休顯其愈懋哉可

淮南轉運副使張景憲金部郎中制

勅某入佐三司出使諸路皆朝士大夫之高選有勞當  
錄其可忘哉爾行義之修才能之邵見稱當世簡在朝

廷會課進官往其欽服可

三司鹽鐵副使陳述古朝奉大夫司封郎中

三司度支副使趙抃戶部員外郎加上輕

車都尉權三司戶部副使張燾朝散大夫

刑部郎中制

勅某人等朕初嗣位奉行先帝故事不敢有廢也具  
官某等行義稱於世才能見於朝佐國大計為功多矣  
序遷位等其往欽哉可

朱處約祠部郎中制

勅某爾嘗為御史持論不阿出守方州稍遷使任序功  
增秩邦法有常往懋厥修以須進選可

孫抗孫琳祠部郎中制

勅某人等都水之官廢久矣朕修之而用爾為丞爾維  
才能懋建厥事有司論課當以時遷進序名曹往祇無  
斁可

提點福建路諸州刑獄公事王陶祠部郎中

制

勅某朕選置使者清明於諸路所以待之非輕也爾踐  
更衆矣才美有稱備在遠方能修其職進遷位等往愈  
懋哉可

權提點廣南西路刑獄杜千能祠部郎中制  
勅某朕初即位羣臣朝者皆增位一等有功當遷又皆  
得以序進爾材諳行治見稱於衆奉使於外治聲流聞  
會課進官往其祗服可

三司戶部副使張燾兵部郎中制

勅某考績三歲進官一等先帝所以勵羣臣也具官某秉哲迪義有聲於時能勵厥修以宜官政序功增位其往欽承可

苗振職方郎中制

勅某尚書郎中序列五品其於朝廷之位亦已顯矣爾用選擢嘗更任使積功久次得在此位所居三歲宜進一官至今而後得遷乃以爾嘗有謫朕於黜陟豈苟然

哉自爾取之而已往思自勉以稱褒升可

王舉元刑部郎中制

勅某薦非其人而與其罰古之道也爾久以才實外更  
任使風績之邵靡人不稱而任舉有失法常坐免雖更  
教令猶褫一官以懲上報之稽而塞人言之衆膺踐厥  
服往其勉哉可

侍御史知雜事判都水監王綽刑部郎中制

勅某御史皆吾耳目之官而折百工以法刑之中者也



考其功狀在法當遷則吾豈可以忘哉以爾具官某忠厚諒直有稱於世踐更衆職皆以能聞故寘之臺中位次執法名實之善允于人言姑疇積功序進一等位亦顯矣往其勉哉可

胡況都官郎中制

勅某爾以才行自昭於時外分將符內序郎位致勤厥職三歲於茲稽狀有司法當增位進遷一等其往懋哉可

周燮都官郎中制

勅某褒善錄勤邦有常法爾以才能行義登顯朝廷序  
正郎位三年於此矣進遷一等以懋厥勤勵治我民乃  
其能稱可

宋孝孫比部郎中制

勅某褒功錄善邦法有常爾共厥官服采惟謹久於郎  
選會課當遷愈其勉哉以稱新命可

監在京都鹽院錢暄比部郎中制

勅某古者官有職而命有數非有職不足以序羣才非有數不足以差衆功今官有品猶古之命數也命之數自一推而上之至於九官之品自九推而上之至於一大畧蓋無以異而其詳如此不同唯其欲得賢者之在位則古今一也爾以才能行治進序於朝年除歲授既得列於五品久於職事法又當遷其亦可謂寵榮光顯矣其思自勉以稱吾欲得賢者在位之意哉可

三司戶部判官充祕閣校理王繹工部郎中

制

勅某三司理財之吏與館閣校文之官皆朝廷雋乂之選也其於進秩有異數焉爾以藝文世家而祇慎謹飭久在此位有勞當遷序於名曹其往思稱可

李章屯田郎中制

勅某褒善錄勤朝廷之政爾才能行治比見推稱會考績之法當增位序進遷一等其往懋哉可

周延雋屯田郎中制

勅某郎中五品而司田以待藝文之士爾大臣之子強學瞻辭出典一州序功當進往祇厥位其克懋哉可

職方員外郎竇綱可屯田郎中制

勅某漢明不以郎官假貴戚以出宰百里為不可以非其人今之郎選其重非漢比也而郎中序于五品其授豈可以輕哉爾以文藝起家以吏能從政序遷此位嘉寵爾勞往服訓辭勉求報稱可

職方員外郎卜紳可屯田郎中制

勅某郎中序列三等其品皆為第五非積功久次則不得至焉爾以文藝入官而濟之謹潔久於任使當得進遷茲維爾階其往祇服可

職方員外郎朱從道可屯田郎中制

勅某尚書郎選於今為重而郎中列於五品爾精敏強果號為才臣積功累勤以致此位往共厥服其愈懋哉可

晁仲綽鄭隨可屯田郎中制

勅某郎中序列五品非久於任使有勞而無罰則罕得  
至焉爾以文藝起家以才能為吏稱功累善當得進遷  
往其懋哉思稱新命可

太常博士權御史臺推官杜訢可屯田員外  
郎制

勅某尚書郎位吾所重也爾名臣之子行義修飭才能  
有譽而職事無過審官稽狀當以時遷新命維休往其  
祗服可

駕部員外郎薛仲孺可虞部郎中制

勅某郎中五品於朝廷為顯位爾悉心為吏才敏見稱  
當所踐更咸有功最進遷惟允其往懋哉可

提刑楚建中可司封員外郎制

勅某朕置使者以察天下之獄其選擇甚難而視遇之  
甚厚序功錄善其可忘乎爾行治才能有聲於世服官  
惟稱會課當遷以懋爾勞往其祇訓可

侍御史邢夢臣可司封員外郎制



勅某侍御史於御史之選為高而尚書郎以司封為前列爾才能行義常見推稱於有言職為一臺高選任責未久序勞當遷往副司封愈其自勉可

都官員外郎充祕閣校理王异可司封員外郎制

勅某爾以藝文高第進仕朝廷廉靖謹良有稱於世校文祕閣典事方州甄序歲勞進遷惟允往共厥服其愈懋哉可

權梓州路提刑都官員外郎張師顏可司封

員外郎制

勅某爾修潔精敏達於從政嘗更任使皆以才稱故以一路之庶獄寄之督察方行就事會課當遷往懋厥修以求稱職可

度支員外郎充崇文院檢討晏成裕可司封  
員外郎制

勅某爾以文藝之學在討論之官丞於太常典掌禮樂

有勞可錄其以序遷於世大家爾為能保往思淑慎無  
廢厥勤可

祠部員外郎充祕閣校理蔡抗可度支員外  
郎制

勅某序功錄最邦法有常惟敏厥修乃能自稱爾以校  
讐之選受吾蕃屏之寄材能行治見譽於時而會課有  
司番遷厥位官無虛授往可勉哉可

權利州路轉運使度支員外郎蘇宋可兵部

員外郎制

勅某朕欲明清於吏民而擇使以莅之非特使之轉貨財以贍有司而已也爾彊敏謹潔達於從政往充其選克有成勞序進一官愈祇乃服可

三司鹽鐵判官度支員外郎集賢校理王益柔可兵部員外郎制

勅某任賢使能而繼之以黜陟先王之所以治未有政此者也爾惟賢故序於校讐之職爾惟能故列於會計

之官稽狀有司法當增位其遷一等以懋爾勞可

太常博士充集賢校理同脩起居注判三司  
度支句院錢公輔可祠部員外郎制

勅某序功黜陟邦法有常爾文章博美行義純潔施於  
政事又以材稱會課進遷蓋維常法往祇厥位其亦懋  
哉可

國子博士朱延世可虞部員外郎制

勅某尚書虞部掌天下之山澤而脩其時禁郎官職事

雖廢而官名猶貴於時非歷試而有勞即不得以此位若爾之潔廉畏慎蓋知所以自保矣其愈懋哉可

比部員外郎鄭伸可駕部員外郎制

勅某爾勤敏謹潔以脩厥官會課有司當得遷位司與之副其往懋哉可

都官員外郎許遵可職方員外郎制

勅某爾進以藝文而兼通律令之學故於為吏常以才稱第課有司當得進位祇予新命厥往懋哉可

都官員外郎陳汝羲可職方員外郎制

勅某審官之法吏有勞而無罪至於三歲則遷位一等亦所以勸也爾文學政事有稱於世久更任使會課當遷往服寵章愈其思勵可

都官員外郎章俞可職方員外郎制

勅某爾以藝文之學政事之材所更滋多皆有善最三載考績法當進遷往踐厥官愈其思勉可

韓繹可職方員外郎制

勅某三歲一遷審官馭吏之常法也然非智謀忠力能舉其職事者亦何以稱此哉爾纘德善之慶而以藝文自奮施於吏政強敏有聲膺此寵榮其知勉矣可

都官員外郎劉牧可職方員外郎制

勅某朕置使者以察諸路而選才士以佐之爾行義智能比見稱述往共職事會課當遷懋勉厥勤以稱官使可

都官員外郎王易知可職方員外郎制



勅某爾久於試用常以才稱出守一州可有為矣而有司會錄當得進官往既厥心以祇予訓可

屯田員外郎謝景初可都官員外郎制

勅某周官司士三歲則稽士任進其爵祿而方今審官之法用焉爾名臣之子操行修潔文學政事有稱於時審官序勞當以時進往踐爾位厥維懋哉可

屯田員外郎何世昌可都官員外郎制

勅某尚書之實多廢矣而郎位尚為朝廷所重爾藝文

操行政事之材推舉進遷以至於此出佐州治論功應  
條改序中行往其祇服可

屯田員外郎陳安道可都官員外郎制

勅某士夫奉法循理以共厥服至於三歲而無咎罰其  
可無進遷之法以慰勉之哉爾藝文起家而行義脩飭  
比更器使實以才稱往服寵章愈其思勉可

屯田員外郎晁仲約可都官員外郎制

勅某褒善錄勤朝廷之政爾清明敏達士類所稱典治

一州風政彌劭有司序績當得進遷往服寵章愈其思  
勉可

屯田員外郎唐諲可都官員外郎制

勅某爾藝文行治進有可稱為郎尚書三年於此矣職  
事之最法當進遷愈其懋功以對新命可

屯田員外郎林大年可都官員外郎制

勅某士之有為者豈必慶賞而後勸哉然黜陟者勵世  
之通法而為天下者所不能廢也爾被文蓄德從政有

聲會課當遷序官一列往其勵勉膺此寵榮可

太常博士胥元衡可屯田員外郎制

勅某仕於朝廷者有勞而無罪至於三歲則遷位一等所以明有勸也爾名臣之世行義脩飭以才自奮從政有稱往服寵章愈其思勉可

太常博士李處厚可屯田員外郎制

勅某爾政事之材藝文之學潔身慎行皆以有稱試請利權是亦煩使序功錄最當得進遷列職南宮往其祇

服可

比部員外郎呂元規可駕部員外郎制

勅某褒善錄勤邦有常法爾護軍糴將邊漕悉心營職  
才諳見稱會課序遷往其祇服可

吳充轉官制

勅某士之好德樂善而無求則爵賞有不足以勸焉而  
爵賞固不廢乎無求之士爾文章行義政事之實士友  
之所服朝廷之所稱然方試爾於外以觀爾為而審官

上爾歲月之勞法當遷位一等此雖不足以為爾勸而天下至公之法不可以廢者也往其懋承之哉可

劉敞轉官制

勅某褒善錄最朝廷至公況吾邇臣在法當陟具官某文章博美政事詳敏心通道德之意躬率仁義之行久於侍從實允詢謀付以方維又能鎮撫甄序乃績進遷厥官朕命惟休往其祇服可

劉覺等轉員外郎制

勅某官所以制祿位之等職所以敘才分之宜視職之  
廢舉與行之失得而下上其官此吾為天下立法以廢  
置賞誅之大體也爾持其行而無失修其職而無廢三  
年於此矣不可以徒置也宜有賞焉序進一官往欽乃  
服可

王伯恭轉官制

勅某方今仕於朝廷者率三歲而一遷論者患其不足  
以勸功然日月久矣能祇慎不急免於罪悔則亦宜有

以褒嘉此朕所以使爾得遷之意也士之為義蓋有常心何必利焉然後知勸可

王允轉官制

勅某爾能誦先王之言以得祿位施於有政又以才稱丞於殿中歲月久矣博士之選儒者所宜以為爾官其往祇載可

李正臣轉官制

勅某書曰欽哉欽哉惟刑之恤哉此吾所以建審刑之



職而擇取智能之士以為詳議之官爾以藝文起家又能明習法令靖共厥位有伐當遷姑使序於太常而仍其覆讞之事往為審克以稱欽恤之意可


劉叔寶轉官制

勅某士之修身慎行宣力四方豈皆以取爵祿之報哉蓋其志有以謂義當如此然而爵祿必稽行治勞烈而加焉今吾序進爾官以有積功之實義不可以無報也在爾自為則欲知夫義當如此而無志乎寵利然後可

以事君往其勉哉尚有終譽可



臨川文集卷五十



總校官庶吉士

臣

張能照

校對官檢討

臣

龔大萬

膳錄監生

臣

朱懷玉

欽定四庫全書薈要

集部

臨川文集卷五十一

二



詳校官助教臣常循

欽定四庫全書薈要卷一萬四千七百三十九

集部

臨川文集卷五十一

宋 王安石 撰

外制


周革轉官任迥等加勲制二道

張慎修徐師回等改官制二道

磨勘轉官制二道

明堂宗室加恩制

皇姪孫世永改隴州防禦使皇姪從古登州防



禦使皇姪曾孫令璫右千牛衛大將軍制

三道

鄭穆錢袞周豫楊南仲姚原道晏宗讓劉溫並

太常博士制七道

柴餘慶國子博士制

邵亢太常丞制

蔡說晁仲熙王元甫並殿中丞制三道

高應之國子博士張侁太常丞范褰胡掖殿中

丞制二道

王介毛麓許懋傳顏陳舜俞句士良並秘書丞  
制五道

商傳張璘王岫王侔並光祿寺丞制四道

郎凡孫琪衛尉寺丞張次元並大理評事制二  
道

柴元謹陳巨卿並衛尉寺丞孫琬大理寺丞制  
二道

張服尹忠恕張慎言孫昱薛昌弼雷宋臣太子  
中舍劉師旦殿中丞制二道

方蘋高安世張湜傅充黃汾王塾並太子中舍  
制三道

王申等太子中允雷宋臣太子洗馬制二道  
熊本高旦孫思恭並著作佐郎制三道

王廣廉孫覺姚闢游烈張公庠高膚敏崇大年  
潘及甫阮邈並著作佐郎馬好賢大理寺



丞制八道

劉仲章施遜周同吳安操高定林宗言徐縝李  
文卿陳仲成張譚鄭民表韓煜吳太元劉  
公臣白贄錢藻段叔獻于觀馮翊辛景賢  
朱東之並大理寺丞制十八道

陳確大理寺檢法官制

魏綢石祖良蘇軾何景先何景元張璪並大理  
評事制五道

許將簽書昭慶軍節度判官廳公事制

樞密院編修周革轉官制

勅某語曰前事不忘後事之師也今吾樞密之府自祖宗以至於今不啻百年捍患持危應變之大計與夫將相論議之臣密謀要策有補於世者皆具在此而文書貿亂淆雜而無紀亦何以待後事乎故擇能臣使序次焉而爾以才稱實當其任今遷爾位唯是勉哉可

屯田員外郎任迥等加勲制

勅某等朕獲休享於神而嘉與在位同其福祿爾等並  
由材選列在郎位相時釐事能勵厥勤甄序有差徃其  
祗服可

張慎修等改官制

勅某等士之選於吏部者多矣以貌以言而取吾皆不  
足以得之此吾所以推耳目之任而付之刺舉之臣使  
各察其所部而以賢才告上今爾等從政於外而為刺  
舉者所稱故吾召見於庭而秩以省寺之官徃其勉思

所以事君無使稱爾者受不任之咎可

徐師回等改官制

勅某等詩曰不解于位民之攸墜蓋吏能夙夜不懈於其職事以無過失然後民得以服勤而有勸功樂業之意吾所以制為祿位以待天下之吏以時論其功狀而進退之凡以為民也爾等並列於朝而久於其職序遷爾位惟是勉哉可

磨勘轉官制二道

勅其等有司考爾等之伐閱而揚爾等於朝廷朕親覽  
焉皆應遷法夫命官賦祿之事朕非輕之也維以章有  
德序有功名在審官則三歲而一遷亦維以閔夫職事  
之勞而勉之盡力爾等勿謂名器之可計日以自取也  
而無報上之意焉可

二

勅其虞以九載黜陟庶官周以三歲誅賞羣吏其為法  
異而勸沮之意同爾之積功實應遷法序進厥位維以

勸能書不云乎德懋懋官功懋懋賞爾則善也朕何愛焉可

明堂宗室加恩制

勅某朕既肆祀於明堂而大賚以布神之福爾列名屬籍序位內朝肅雖在庭克相釐事以差受寵其往懋哉可

皇姪孫左屯衛大將軍登州防禦使世永改隴州防禦使制

勅朕永惟太祖皇帝德加於後世博矣而諸孫爵位  
莫有顯者甚非所以惇叙九族承宗廟之意也具官某  
躬率德義克承厥休方將營衛之屯而領兵防之任其  
正使號稱朕志焉可

皇姪右衛大將軍蘄州防禦使從古登州防  
禦使制

勅朕選於近屬以治親親唯賢與能宜在此位具官某  
躬率德善自昭於時以選攝事久勤不懈其遷使號而

正其職服之名焉往踐寵榮愈思慎臆可

皇姪曾孫太子右內率府率令礲右千牛衛

將軍制

勅其治天下自人道始而以治親為先務爾序于屬籍  
率履不違遷率東宮十年於此矣進踐祿次往其欽承  
可

鄭穆太常博士制

勅其士之著籍審官者雖在䟽逖猶三歲而一遷又況



以才被選有職事於禁門之內者哉嘉爾言行發聞于世膺此恩典徃其欽承可

錢袞太常博士制

勅某太常古宗伯之官而博士掌其掾法增損因革皆合於事久而不失先王之禮意然後可以為能其任固已重矣今雖職廢而非文學出仕則不得以名官爾以叙進而膺此選其尚能勉以求稱哉可

集賢校理周豫太常博士餘如故制

勅某籍於審官之士雖身在外有司會其伐閱歲滿輒遷況於以才進選而列職秘近者哉爾維峻良膺此恩典往其祇勵以服寵榮可

楊南仲太常博士制

勅某爾文學藝能見稱於世服官惟謹克以有勞承于太常是謂華選遷秩博士往其欽哉可

姚原道太常博士制

勅某爾以藝文出仕而才諳見稱備任遠方有勞當錄

博士之選往其欽哉可

晏崇讓太常博士制

勅其爾名臣之子行義修飭能以藝文自奮而於職事  
有勞序遷厥官其往祇服可

劉溫太常博士制

勅其爾承祕書三年矣故稽爾功狀秩于太常爾行義  
才能有稱於世無曰官小往其欽哉可

柴餘慶國子博士制

勅某爾於為吏才敏見稱會課有司當得遷位博士之  
選往其勉哉可

邵亢太常丞制

勅某古者尚賢而輕爵好藝而賤祿所以士樂羞其行  
而為時用也爾列于東宮之職事三年於此矣羣牧之  
任開封之選皆能稱職遂佐三司其序爾功進官一等  
若爾之藝文政事吾豈有愛於爵祿乎哉往懋厥修以  
需其後可

蔡說殿中丞制

勅某宗祀之成慶覃䟽逖爾久於常選丁此殊恩甄序  
有榮往其祗服可

晁仲熙殿中丞制

勅某爾以謹潔能不失其世守故積功久次致位於朝  
往佐一州又應遷法愈其懋勉以稱褒嘉可

王元甫殿中丞制

勅某吏之有籍於審官者三歲一遷所以勸勞也爾以

才備任積課應條往服命書愈其思勉可

高應之國子博士張俅太常丞范褒殿中丞

制

勅某等爾等親吾民於外而吾使有司會課于中皆能有勞以應遷法夫上之爵賞無私德惟以治人臣能率職以治人則可謂能報上矣各踐爾位惟時勉哉可

胡掖殿中丞制

勅某汝官在東宮而得列於朝廷之位有司奏課當以

時遷夫祿所以等功位所以序德朕所以命汝者每加厚矣汝所以報稱者亦可以勉哉可

王介祕書丞制

勅某朕設科以來異能之士而親發策問之爾言不阿而學問多中乎義理其遷厥位以嘉爾之能言夫士無不能有不為爾若爾之修潔有志而濟之以明敏之才惟所施焉將無不至況於一官之小豈以不稱為患哉可

毛麓祕書丞制

勅某古人有言曰無恒產而有恒心者唯士為能夫所謂士者不以無常產而變易其心又奚俟於爵賞而後勸哉然士之有功則爵賞加焉天下大公之法也爾以進士起而序於王官之列出長一邑之民有勞而無罪三年於此矣其使遷秩以信大公之法朝廷之位亦加顯矣所以為士者可不勉哉可

許懋傳顏並祕書丞制



勅某爾雖任職于外而功罪之籍實在審官之府以時  
會課於法當遷夫三歲而序一官在會之所同然材實  
行治不有以稱其位則孰以為非苟得也爾以藝文自  
奮而由稱舉以至於此其知之矣可不勉哉可

陳舜俞祕書丞制

勅某爾以賢良應詔朕嘗親冊而秩以京官幕府三年  
序遷一等此特有司之常法爾豈所以待異能之士哉  
往其勉之以俟時用可

句士良秘書丞制

勅其爾佐著作于秘書三年矣審官稽狀當進一官惟爾以文藝起家而以吏能為邑往欽新命其克勉哉可國子監直講商傅光祿寺丞制

勅其爾讀群經而能通知其義故選於衆以教國子有司稽任當以勞遷往服爾官愈其思懋可

張璘光祿寺丞制

勅其爾父為吾執政之官而爾能夙夜祗飭以修其職

事可謂能世其家矣今有司會課而吾以爾丞于光祿  
往思勵勉以永燕譽之終哉可

王岫光祿寺丞制

勅某詩曰維其有之是以似之以為賢者之後功臣之  
世非有以存之則無以似續其前人也爾以蔭籍入官  
而能舉其職以應有司之遷法可謂知似續其前人矣  
丞于光祿其往勉哉可

王佺光祿寺丞制

勅某爾大臣之家賢者之後能自策勵不墮其官序勞當遷往踐厥位無忝爾祖乃惟顯哉可

奏舉人前陝州節推郎凡衛尉寺丞制

勅某選於吏部者多矣非使在位者舉其類則善人豈能自進乎爾能勵厥官以多薦者丞于衛尉其愈祇修可

孫琪衛尉寺丞張次元大理評事制

勅某等材施於一邑知效於一官至于三年而無職事

之負焉不可以無報也序進一等往其懋哉可

柴元謹衛尉寺丞制

勅某商之有征久矣所以銷沮游末而勸之力本非特  
收其贏財佐公上之急而已也爾勤其事以有累日之  
功序進一官以從大雅無德不報之義爾維世族尚克  
勉哉可

奏舉人前梓州郫縣主簿陳巨卿衛尉寺丞  
奏舉人前權復州軍事推官孫琬大理寺

丞制

勅某選於吏部者多矣非使在位者舉其類則善人豈能自進乎爾能勵厥官以多薦者丞于卿寺其愈祇修可

張服尹忠恕張慎言孫昱太子中舍制

勅某周官三歲則大計羣吏之治而誅賞之故朕時憲以為考績之法夫吏者三歲能率職礪行而無罪悔是宜有賞序官一等以慰爾勞維爾良能宜加報稱可

薛昌弼雷宋臣太子中舍劉師旦殿中丞制  
勅某審官考課之法成於先帝之時朕維奉循以職  
名器無有親疎遠近使有司一是以待之嘉爾有勞序  
遷一等勉共爾位率志忘私庶乎能稱爵賞之公而終  
無尤於職事可

方頻高安世張湜傳充並太子中舍制

勅某等吾於爵祿甚慎閔仁百姓甚篤爾等或專一縣  
或佐一軍而皆列於卿丞之籍蓋嘗有所試矣今有司

序功當得遷位吾雖甚慎爵祿而於爾等無所愛焉其  
勉思拊循百姓以稱吾閔仁甚篤之意可

黃汾太子中舍制

勅某吾擢天下之才而立民長伯萬家之縣又有戎馬  
之任焉其稱甚難而爾能其事有勞遷秩毋廢爾成可  
王塾太子中舍制

勅某爾丞于理亦既三年有職事之勞無行義之過使  
遷厥位著籍外廷夫與於燕而坐於朝報禮亦云異矣



往祇乃服其可不思可

奏舉人前永興軍節度掌書記王申等太子

中允制

勅某等皆以藝文起家而久於常選才能行義數見推  
稱揚于朝廷各命以位往共厥服可不勉哉可

雷宋臣太子洗馬制

勅某周人事神以諱而不諱嫌名持循至今遂著為律  
爾以難避之諱而辭當拜之官自言冒榮有所不忍其

更位號以慰孝思慎爾百為勉求稱此可

熊本著作佐郎制

勅其吾歲取吏部之選者以為宮監省寺之官常不啻  
乎百人論者患其多焉詩不云乎濟濟多士文王以寧  
有天下者豈以士多為患哉顧其所取何如爾汝藝文  
政事皆見稱述往踐祿次蓋將有補於時使人視吾所  
取而不以為多在汝勉之而已可

高旦著作佐郎制

勅其唐虞以三考黜陟幽明而其所命或終身於一職  
然則其所謂陟者蓋爵服之加而已今之增位猶古之  
加爵服也以爾久於職事而功用應於有司之法故使  
增位以報焉雖考績之歲月與黜陟之方古今不同而  
吾所以褒勵庶工非與唐虞異意爾其毋怠思稱厥官  
可

國子監直講孫思恭著作佐郎制

勅其爾才能行義有超卓之譽於時故遷於衆以教國

子而又寵以校讎之官有司稽勞當得遷位列職東觀  
往其懋哉可

奏舉人前祁州深澤縣令王廣廉著作佐郎

制

勅某爾用舉者為縣又能修其職事而舉者衆多升序  
厥官屬之東觀夫士之有能有為也豈必戒敕而後勉  
哉爾以才稱其知自勸矣可

奏舉人編校昭文館書籍孫覺著作佐郎制

先帝置校讐之官所取皆天下望士爾惇行力學為時  
俊傑治民有紀稱者衆多會課進遷往共厥服可

奏舉人姚闢著作佐郎制

勅其祕書省有著作之官所以待藝文之士爾瞻辭博  
學而為吏有聲甄績序材以登茲選往共職服其亦勉  
哉可

奏舉人游烈等著作佐郎制

勅某等皆以藝文起家而久於常選才能行義數見推

稱揚于朝廷各命以位往共厥服可不勉哉可

奏舉人張公庠著作佐郎制

勅某爾嘗為令而能以材譖為在勢所稱寘諸京官以  
懋乃績往踐祿次愈其勉哉可

高膚敏崇大年並著作佐郎制

勅某爾等皆以才能序于莫府舉其職事稱者衆多會  
課超遷往其祗服可

潘及甫著作佐郎制

勅某等選於吏部久矣皆能以才自奮為在位者所稱  
稽狀有司列官省寺往須器使無替厥修可

奏舉人阮邈著作佐郎馬好賢大理寺丞制  
勅某等省寺之有丞郎其名位高下不同而於今皆為  
遴選爾等從事於外以能見稱有司書勞朕所親覽各  
踐厥位往惟慎哉可

直講劉仲章大理寺丞制

勅某爾方以經術教國子而有司會課當得進遷爾以

通經發聞於世允蹈所學尚何訓哉可

施遜大理寺丞制

勅某三歲一遷朝廷之法爾共其職事在法當遷往懋厥修以祇朕訓可

奏舉人周同大理寺丞制

勅某爾能勤厥官以有舉者有司條奏在法宜遷使得傳籍於審官以為大理之屬當知夫名器之不可以徒得也往思懋勉以稱之可



吳安操大理寺丞制

勅某爾名臣之家能自修飭考論功最當得進遷往服  
官成勿墮所守可

高定大理寺丞制

勅某朕布功賞之信苟有功可以中率則無擇小大遠  
邇而加焉今有司條奏爾勞在法當賞往丞于理其懋  
厥官可

林宗言大理寺丞制

勅某有司言爾當遷而朕視功狀如有司之言故使遷  
爾位一等吾嘗詔有司以時視士大夫功狀而叙進之  
毋使自言欲夫在位知有禮讓而不以官為利也爾知  
之矣可不勉哉可

徐績大理寺丞制

勅某爾出於世祿之家而服勤筦庫之事行不愆於法  
才不曠其官遷以報功往其思勗可

李文卿大理寺丞制

勅某吏之近民者莫如令故位非高也祿非多也而吾  
不輕以與人爾得為之以有稱者往施於政又以才稱  
實諸京官以待任使思永終譽厥惟勉哉可

奏舉人陳仲成大理寺丞制

勅某欽之為州也窮於山谷之間吏常患乎州窮而刺  
舉者有所不知爾勤其官而稱者甚衆可謂能矣其進  
以為京官往懋乃成以終有譽可

張誼大理寺丞制

勅某古之爵賞與士共之雖有衆譽而功實不副焉亦不可以幸而得也此吾所以閱稱舉之衆而又稽歷試之勞然後命爾以丞于大理也夫去吏部之選而有錄於審官能祇慎不懈以免於文吏之議則雖高位尚可循而至可不勉哉可

鄭民表韓煜大理寺丞制

勅某爾服勞州縣才諳見稱甄序厥功使丞于理往祇休命惟既爾心可

吳太元大理寺丞制

勅某審官之法三歲一遷爾嘗有罪故使序于大理四年而後遷以為承賞誅黜陟吾無私焉皆爾自取也施於有政可不勉哉可

奏舉人劉公臣白贄並大理寺丞制

勅某等今吾大吏舉非其人有坐斥廢其於舉人豈顧不慎哉然而坐斥廢者時時有之此殆求舉者不一其始終以負之爾今爾等皆以衆舉故吾命以京官勉思

一其始終以無負於舉者可

國子監直講編校集賢院書籍錢藻大理寺

丞制

勅某朕設科以招方正之士而爾應其求置局以儲雋  
乂之材而爾充其選有司會課當得進官若爾之諒直  
多聞方且善其行以為時用往祇厥位可不勉哉可

段叔獻大理寺丞制

勅某以爾典京師之獄滿歲于此矣而未嘗有失丞于

卿位以懋爾勞維朕哀矜庶獄之有不辜爾所知也守爾常操尚無誤哉可

奏舉人于觀大理寺丞制

勅某方今漕頻海之鹽以食東南而收其息以佐有司之急倉庾之官一失職而至於耗惡則足以匱國而傷民故稱舉能吏而待之厚賞所以勸也爾從其事能有成勞丞于理官往踐無懈可

馮翊辛景賢大理寺丞制

先帝使大吏推舉常選之士以補省寺之屬爾能修其職事而舉者衆多率由舊章命爾以位往祇厥服以稱甄升可

試大理司直兼監察御史朱東之大理寺丞

制

勅某爾以幹闕謹潔能舉其職事而屢為在位者所舉歲滿序功法宜有賞理官之屬其往懋哉可

陳確大理寺檢法官制



勅某朕制中典以刑四方非惟不失天下之姦惟以使  
人無犯有司而已今明試爾才之可使而後以為屬于  
理官爾其知恤庶獄之不辜而求所以出之以稱朕哀  
矜元元之意可

魏綢大理評事制

勅某爾備屬奉常亦已久矣序進厥等以旌有勞夫三  
歲一遷雖厚祿可以馴而致欲為善者亦如此矣能積  
智累勤而不已則亦何所不至乎在爾勉之以求為可

進也可

石祖良大理評事制

勅爾士之有籍於審官者皆三歲而一遷今爾歲滿故  
吾進爾位加爾祿夫祿以等功而不以志位以序德而不  
以勞爾世厥家其知勉矣可

應才識兼茂明於體用科守河南府福昌縣  
主簿蘇軾大理評事制

勅某爾方尚少已能博考羣書而深言當世之務才能

之異志力之強亦足以觀矣其使序於大理吾將試爾  
從政之才夫士之強學瞻辭必知要然後不違於道擇  
爾所聞而守之以要則將無施而不稱矣可不勉哉可  
何景先何景元並大理評事制

勅某春秋之義以貴治賤以賢治不肖今天下人民之  
衆賢者不為不多爾得列於京官其賢於人宜如何也  
今爾累日之課又當遷序其位亦云不賤矣其為賢也  
亦可以勉哉可

張增大理評事制

勅某吾推恩大臣之子爾得列於祠官能任事而有勞其以備士官之屬爾父起於閭巷以能大其家室者豈一日之力哉爾惟積勤累善法象而不違則豈特有慶于爾宗又將有賞于而國可

前鄉貢進士許將大理評事簽書昭慶軍節度判官廳公事制

先帝親第進士於廷而以爾為第一爾於藝文可謂能

矣所以施於政者朕將有所試而觀焉夫士之遇時不患  
無位思所以立往其勵勉以副東求可

臨川文集卷五十一

欽定四庫全書薈要卷一萬四千七百四十

集部

臨川文集卷五十二

宋 王安石 撰

外制

孫實大理評事制

韓鐸王任徐瑗王夢易並充節推知縣制四道  
廖君玉陳周翰並奉禮郎制二道

李允恭可太常寺太樂耿允恭包文顯可並太  
常寺太樂署副正制

英宗即位覃恩轉官龍圖閣學士至龍圖閣直

學士制

發運轉運提刑判官等制

卿監館職京官館職制二道

分司致仕正郎以下京官等制

諸司使副至崇班內常侍帶遙郡不帶遙郡制

皇兄叔弟姪大將軍以下制二道

覃恩杜皇后賀皇后尹皇后孫姪等轉官制



中書提點堂後官制

李端卿等舊官服闋制

張德溫任迴宋輔國等舊官服闋制三道

劉辯孫公亮王忠臣張諷舊官服闋制三道

元居中張詵張扶李安期張德淳舊官服闋制

四道

馬文德康瑋舊官服闋制二道

皇姪右監門衛大將軍仲登服闋舊官制

韓琦奏親姪孫恬祕校親姪女之子曹復戶曹

制二道

胡宿奏親兄亶守祕校制

司馬光親兄之子宏蔡抗男潛並試將作監主

簿制二道

龐籍遺表男元英屯田元常大理寺丞孫保孫

寅孫外孫陳仲師將作監主簿制四道

田況遺表男守祕校至安太常寺太祝制

吳育遺表孫男儼休並守將作監主簿制

宋祁遺表男俊國廣國守祕書省正字孫松年  
延年頤年並將作監主簿制二道

崔嶧遺表親孫男俞范師道遺表第三男世文  
張方遺表親男平易並守將作監主簿制  
三道

呂師簡遺表次男昌宗張璠遺表親次孫彩試  
將作監主簿余良孺遺表曾孫渙張溫之

孫基張亢遺表孫在至塋並將作監主簿

制五道

魏琰男太廟齋郎紆張應符男遺徐仲容男公

輔李卓男元之並試將作監主簿制四道

諸州軍并轉運提刑弟姪男恩澤等並試監簿

制

王孝叔通判春州兼知本州制

李執中可察推制

呂開依前充鎮南軍節度推官制

富翺葛頤趙君序齊景甫並縣令制四道

李燾李昌言並錄事參軍制二道

賈逵充侍衛親軍步軍副指揮使制

錢晦霸州防禦使李端慤眉州防禦使周翰嘉  
州團練使制三道

程榮充御前忠佐馬軍副都軍頭制

轉負制

落權團練刺史制

劉永年知代州制

趙滋依前充侍衛親軍步軍都虞候制

孫實大理評事制

勅某爾名臣之子能飭身慎行強學自奮而有司會課  
當以序遷其進一等以為士官之屬往共爾職其克懋  
哉可

韓鐸試大理評事充天平軍節度推官知遂

州遂寧縣制

勅某爾用薦者為令又以脩治見稱試職士官序于幕府字人之任其愈懋哉可

王任試大理評事充節推知縣制

勅某爾任舉者為令而能修其職以見推稱命爾以為幕府之官而又試以字人之事夫南面而聽百里豈輕也哉維能強恕以求仁然後副吾置吏為民之意可

徐瑗試大理評事充保信軍節推知梓州射

洪縣制

勅某有百里之地而人民社稷之事繫焉其任豈可以輕哉爾嘗試矣見謂辨治故又任爾以吾所重而寵以幕府之官往其勉哉無慢予訓可

王夢易試大理評事充永興軍節推知遂州  
青石縣事制

勅某朕嘗命汝以幕府之官使長百里之民而汝以喪自解今除之矣其就故官有社與民往其思勉可



縣尉廖君玉太常寺奉禮郎制

勅某爾職在追胥有功中率故襲序爾使得列于太常之屬朝廷慶賀之信如此爾其可不勉哉可

陳周翰太常寺奉禮郎制

勅某爾久於職事能以有勞命課於朝當得遷敘奉常之屬其往欽哉可

太常寺太樂署副樂正李允恭可太常寺太

樂署太樂正太常寺攝樂正耿允恭包文

顯可並太常寺太樂署副樂正制

勅某等太常上其屬有闕而以爾等聞惟爾等皆善於修聲而任職久矣其遷副正以為署長而使攝正署副正往勵厥官無敢豫怠可

英宗即位覃恩轉官龍圖閣學士至龍圖閣直學士制

勅永惟左右有能有為之臣皆先帝遺朕以熙衆功者也方惟大賚以勞天下其可以忘而不及哉具官某惠

和敦大明允忠篤列職近侍實為名臣褒序有加往欽  
乃服可

發運轉運提刑判官等制

先帝享國四十餘年內外晏然克終天祿豈非獻臣才  
士欣助之力哉不及班命以勞功而朕承厥志爾奉將  
使指久以才稱膺此寵章往其思勤可

卿監館職制

勅朕初即位奉行先帝故事以勞天下其施及於䟽遠

而可以忘於近者哉具官某序于書林伐閱多矣率德迪義有稱於時膺踐寵榮往其思必可

京官館職制

先帝棄天下朕初即位纂修故事以勞羣臣爾等序于書林皆以才選褒進有典往其欽承可

分司致仕正郎以下京官等制

勅某等朕初嗣位敷錫庶工非特勞在事之勤亦以禮天下之賢者爾等以才出仕登序王官或就里居或分

留務往膺寵數咸懋厥修可

諸司使副至崇班內常侍帶遙郡不帶遙郡

制

勅某等朕初即位奉行先帝故事大賚四海阻深幽逖  
無所不及矣又况朝廷之近臣豈可以忘哉爾等能  
以忠力靖共職事進位一等往其欽承可

皇兄叔大將軍以下制

先帝顧哀宗親德念至深厚矣在後之恫其可以忘哉

具官某躬執義行序于屬籍承休席寵亦既顯融褒進  
有章往欽無斁可

皇弟姪大將軍以下制

勅某朕大賜於天下雖䟽以遠無遺者矣又況於宗室  
之近哉爾序官內朝克有善問繩繩之慶協於聲詩褒  
命有加往其祗服可

覃恩昭憲杜皇后孝惠賀皇后淑德尹皇后

孫姪等轉官制

勅某等予大祭于廟祧而哀夫先后之家寢替而不章  
乃詔有司博求其世爾等名在戚里序于王朝各因其  
官增位一等冀以上稱神靈之意宣特慰予追遠之心  
可

中書提點堂後官制

勅某等朕大賚于天下有政有事者皆得以序遷爾等  
各以選掄備官宰旅增位一等往其欽哉可

李端卿等舊官服闋制

勅某孝子之悲哀思慕其親豈有窮哉然喪以三年而止者聖人之政也爾以喪致事日月既除其就故官以聽新命夫人之行莫大於孝而孝亦在乎事君能致其身而不愆於義以辱其名然後可以為孝子此宜爾之所知也其勉矣哉可

前太常寺太祝張德溫舊官服闋制

勅某喪三年亦已久矣而人子之志無窮故欲為不善則思貽父母惡名而終於不果不如是則不足以為人



子復爾祿次維時勉哉終於立身可謂孝矣可

前屯田員外郎任迴舊官服闋制

勅某汝有列於朝廷而以憂去位人子之事親終矣則  
君臣之義其可以忘乎夫移於君而忠移於官而治然  
後可以為孝往共爾服惟是勉哉可

前太常寺奉禮郎宋輔國等並舊官服闋制  
勅某爾以親喪去位日月既除其來造朝復就官次終  
身之孝可不勉哉可

前大理寺丞劉辯前衛尉寺丞孫公亮並舊

官服闋制

勅某爾服縗去位順變當除三年之喪亦已久矣君臣之義其可廢乎趣還于朝使即舊秩勉思移孝之事以就顯親之名可

前大理寺丞王忠臣舊官服闋制

勅某御史言爾以喪釋位日月當除故吾下命書于御史以俟爾之來見爾雖舊官吾命維新其加勸勉求合

於以孝事君之義可

前太子中舍張諷舊官服闋制

勅某喪三年天下之達禮也爾能率禮以至終喪其來  
造朝復爾祿次事君之義爾實知之無違厥初是謂能  
孝可

前職方員外郎元居中舊官服闋制

勅某尚書郎位三等而爾方以勞序于前列乃以喪去  
三年于家今既禫除其還祿次維爾才美有稱於時移

孝事君當知勉矣可

前太常博士張詵舊官服闋制

勅某爾去位里居三年於此既除喪矣其就故官忠以事君是為孝子爾惟知義可不勉哉可

前將作監主簿張扶舊官服闋制

勅某爾遭齊斬之喪而去位釋祥禫之服而還朝班吾命書授爾祿次孝子之事終於立身施于有官可以勉矣可

前駕部員外郎李安期前殿中丞張德淳並

舊官服闋制

勅某禮有三年之喪者無貳事也知喪而已矣先王以  
為不如是不足以盡人心此吾所以歸爾于家而不敢  
勞以事今日月除矣故吾班命書于御史而召爾以來  
往踐故官勉思終孝可

前內殿崇班馬文德舊官服闋制

勅某爾執親之喪三年於此矣其班新命以復故官維

孝有終爾宜思勉可

供備庫副使康璫舊官服闋制

勅某三年之喪苴麻哭泣之哀一也而亦有權制以趣時此吾獨使武吏之有籍於樞密者得終喪于家之意也爾能率禮令服既除其就故官以承新命可

皇姪右監門衛大將軍仲譽服闋舊官制

勅某送終者人子之大事也爾以喪釋位亦既三年能以禮自致而不犯詩人素冠之義於為人子亦可謂孝

矣還就祿次帥初無違可

同中書門下平章事韓琦奏親姪孫恬守祕  
校同中書門下平章事曾公亮親男孝純  
將作監主簿姪孫諶試祕校樞密使張昇  
奏親孫男戒守祕校叅知政事歐陽脩奏  
男辨太常寺太祝叅知政事趙鼎奏孫男  
尤緒太常寺太祝樞密副使吳奎奏長男  
璟守太常寺太祝次男瓌試祕校制

勅某朕受純嘏於神靈而布之在位其官顯者得任其子弟以及孫曾爾生大臣之家是為賢者之類往保祿秩可無慎哉可

同中書門下平章事韓琦奏親姪女之子曹復真定府戶曹制

勅某維名與器朕未嘗輒以假人爾緣大臣相祀之恩遂階一命之寵出而從仕可不勉哉可

樞密副使胡宿奏親兄亶守秘校制



勅某宗祀之恩仕之顯者皆得官其親族爾躬率善行而有弟為吾政事之臣往服寵榮懋修無斁可

天章閣侍制司馬光親兄之子宏試將作監

### 主簿制

先帝有大慶推恩羣臣子弟而爾有叔父實為近臣往即厥官無墮世祿可

廣南東路轉運使祕閣校理蔡抗男潛試將

### 作監主簿制

勅某將漕遠方者皆得官其子弟爾父以才自奮有顯  
於時往懋厥修以綏世祿可

故贈司空兼侍中龐籍遺表男太常博士元  
英可屯田員外郎制

勅某等爾考有庸先朝致位將相歸安第室而以壽終  
爾等服采于時實能嗣訓並膺恩典其往勉哉可

龐籍遺表男內殿宗班元常大理寺丞制

勅某士之文武異用久矣爾世以儒學顯而有官籍於

內朝從爾父之遺言而以丞于大理往惟嗣訓乃克保家可

龐籍遺表孫保孫寅孫並將作監主簿制

勅某爾祖嘗為將相佐佑帝室朕哀其亡也故序爾於工官夫大臣之家能久而不失其世者鮮矣往承厥慶可不勉哉可

龐籍外孫陳仲師試將作監主簿制

勅某朕命爾以試工官之屬者特以爾之外祖常為將

相於先朝而已然士之由保任而後能自奮以至休顯者多矣往踐爾次可無勉哉可

太子少傅致仕田況遺表男守祕校至安太常寺太祝制

勅某雋哲之輔有勞於時福祿既成而爾嗣厥後於其將死以爾為言膺此寵章宜知勉矣可

故資政殿大學士知河南府吳育遺表孫男儼休並守將作監主簿制

勅某等朕所以顧恤大臣之家而序錄其子孫未嘗有  
愛焉況如爾祖賢明諒直有補於世朕常思而不忘者  
乎其各加爾一命以為工官之屬詩曰夙興夜寐無忝  
爾所生往其勉哉可以為孝矣可

翰林學士承旨宋祁遺表男俊國廣國守祕  
書省正字令特服制

勅某等爾考承密命于翰林而不幸至於大故眷懷舊  
德甄序爾官往其有成祇服予采可

宋祁遺表孫松年延年頤年並守將作監主

簿制

勅某等貴臣之世賢者之後朕所不能忘也故爾等皆在沖幼而列于工官茲所以佑序爾家亦云至矣爾所以保其祿位可不勉哉可

刑部侍郎致仕崔嶧遺表親孫男俞將作監主簿制

勅某爾祖嘗服高位考終于家以爾為言朕其甄序工

官之屬往矣懋哉可

戶部郎中直龍圖閣知明州范師道遺表第  
三男世文守將作監主簿制

勅某爾父嘗以才選列官于朝出臨一州奄至大故錫  
爾一命爾其勉哉可

光祿卿直龍圖閣張方遺表親男平易守將  
作監主簿制

勅某朕惟爾父致位九卿服勞于官為日久矣故命爾

以工官之屬以稱其將死之言爾其思爾父之顧厥家  
與朕心之哀爾父夙興夜寐無或弗欽可

光祿少卿知單州呂師簡遺表次男昌宗試  
將作監主簿制

勅某爾父且死而為爾求官故以爾試于工官之屬夫  
推恩既往覃及子孫吾所以待人臣者有常法矣修敕  
自奮而以保祿位者爾所以為人子也可不勉哉可

故光祿卿致仕張璠遺表親次孫彩試將作



監主簿制

勅某爾祖以九卿歸第而遺奏以爾為言顧哀舊臣而  
官使其子孫此先王使仕者世祿之意而吾之所不忘  
也其使試于工官之屬以稱爾祖之志焉詩曰無念爾  
祖聿修厥德爾方就學可不勉哉可

司農卿致仕余良孺遺表曾孫渙試將作監  
主簿制

勅某爾之曾祖仕至九卿退處于家考終厥命推恩及

爾以試工官往慎猷為且膺器使可

故光祿卿致仕張溫之孫基試將作監主簿  
制

勅某爾祖嘗為侍從之臣而有公忠之節今其亡矣秩  
爾以官能善似之乃其無悔可

客省使眉州防禦使張亢遺表孫在至斐並  
將作監主簿制

勅某爾祖起於文吏而能以才武致力於封疆扞患之

功書在王府今其亡矣故各命爾一官往懋爾成毋忘  
爾祖之勤於國可

司農卿致仕魏琰男太廟齋郎紆守將作監  
主簿制

勅某爾世載榮祿而父以九卿去位推恩改命序位工  
官維恪慎可以保家往其勉矣可

虞部員外郎致仕張應符男邁試將作監主  
簿制

勅某少盡其力至於老則養之不可以不終使之免農而為士則祿之不可以不世此先王不忍人之政而吾未能逮也今爾父去位而命爾一官使得世其祿以終爾父之養焉此亦庶幾有合乎先王之政爾惟忠惟孝尚稱吾命爾之意哉可

職方員外郎致仕徐仲容男公輔試將作監主簿制

勅某爾父辭祿而為爾請命于朝傳曰君子之善善也

長故善善及子孫此吾命爾以一官之意也經曰事親孝故忠可移於君居家理故治可移於官爾其念此以自勉哉可

虞部員外郎致仕李卓男元之試將作監主簿制

勅某爾父積勤序于郎位老而致事錄爾一官思世厥家往其無怠可

諸州軍并轉運提刑弟姪男恩澤等並試監

簿制

勅某朕始嗣位推恩宇內爾執方貢以來造朝加賜一官往惟祗服可

王孝叔充春州軍事推官通判春州兼知本州制

勅某南方荒遠之州吏多憚往而爾請行焉故優爾祿賜而以勸賞隨其後往其勉矣思又我民可

縣尉李執中可察推制

勅某先王之政荒則緩刑至於彊不思死而傷吾良民則去之亦不可以不急此朕所以嚴追胥之令信購賞之科不以歲凶多暴之時而為之廢格爾能除盜實舉其官遷以懋功往祗乃服可

呂開權淄州軍事推官依前充鎮南軍節度  
推官制

勅某爾有除盜之功故賞以一邑而序官于大府辭而有請以便爾私吾用不違往其祗服可

蘇州長洲縣尉富翺潤州丹徒縣令制

勅某朕布爵賞之令以待吏之有勞爾能舉其官以除盜賊遷以為令使之牧民又將試爾為政之才非特示朕報功之信可

晉州襄陵縣尉葛頤單州武成縣令制

勅某爾職在追胥而能上功中率畀之一縣以懋爾能夫為令之所事則不特追胥而已必也使人無盜是乃能稱其官可



杭州於潛縣令趙君序號州玉成縣令制  
勅某予嘉爾之有功於追胥也故畀爾邑於東南又從  
爾父之請焉而移爾於號吾於用賞而顧恤爾私亦云  
備矣則爾之施於有政可不勉哉可

信州鉛山縣尉齊景甫杭州餘杭縣令制  
勅某爾追胥有功遷令一邑百里之人視爾以為休戚  
矣施於政事可不勉哉可

單州成武縣令李燾江陰軍錄事叅軍制

勅某爾修其官能中賞率有司會課予懋爾功愈其勉  
哉以涖厥事可

潞州屯留縣尉李昌言徐州錄事叅軍制

勅某爾能捕盜當得賞官遷督一州之郵往其思稱厥  
職可

殿前都虞候利州觀察使賈逵依前官充侍

衛親軍步軍副指揮使制

勅朕有貌虎熊羆之士以衛中國而制四夷考求其人

以副統督具官某久更任使才武有稱扞城之勞宿衛之最簡于先帝以暨朕躬思懋厥修往膺休顯可

衛州防禦使錢晦霸州防禦使制

勅朕初即位奉行先帝故事以勞天下雖踈且遠無遺矣又況於朝廷之顯者哉具官某忠勞奕世簡在帝室能勵厥德自昭于時膺此寵章愈其思勉可

東上閤門使陵州團練使李端慤眉州防禦

使制

勅朕初嗣位奉行故事以勞天下具官某清明敏達和  
慎祇修奉侍先帝陟降左右厥勤茂矣其可忘哉膺服  
寵榮往欽乃服可

捧日左廂都指揮使嘉州團練使周翰制

先帝棄天下朕初嗣位永惟武力忠勞之士為國禦侮  
其功多矣豈可以忘哉具官某部督有方踐修無過營  
衛之最簡于朝廷膺此寵章愈其奮勵可

天武左第三軍都指揮使封州刺史程榮可

蒙州刺史充御前忠佐馬步軍副都軍頭制  
勅某等熊羆之士為國爪牙均其逸勤率用成法爾等  
忠勞之實簡在朝廷遷序有差往其欽服可

轉負制

先帝遺朕熊羆之士以蕃帝室所使統督豈可以非其  
人哉爾等以扞城之材共禁衛之服忠勞武力皆有可  
稱各以序遷往欽無懈可

落權團練刺史制

勅某等忠勞之士武力之臣獎衛帝室其功多矣當序厥位以均逸勤爾等部督有方踐修無過兵團州刺遷進有差往膺寵榮懋建勲績可

單州團練使劉永年可齊州防禦使知代州

制

勅代地邊要吾所重常擇將以守之以爾具官某武力智謀濟以馴謹踐更中外皆有可稱故進使號往共厥服禦侮之實爾其勉哉可

捧日天武四廂都指揮使端州防禦使趙滋  
可依前充侍衛親軍步軍都虞候制

勅營衛之士皆天下武力之高選也所使虞度軍中之  
事者豈可以非其人哉具官某等造行謹良致位休顯  
勲勞之實簡在朕心各以序遷往惟祗服可

臨川文集卷五十二



謹案卷五十一第二十二頁前一行維朕哀矜庶  
獄之有不辜刊本辜訛幸今改





總校官庶吉士臣張能照

校對官檢討臣龔大萬

謄錄監生臣杜成